

REZIMEI PODRŽANIH PROJEKATA
kroz Javni poziv za podršku jačanju kapaciteta organizacija civilnog društva
objavljen 06. septembra 2023. (broj protokola KP-I-408/23)

Aplikant: Udruženje za razvoj i podršku poljoprivrede "Pčelica" Živinice

Naziv projekta: Zelena učionica

Odobreno sredstava: 6.970,00 KM

"Udruženje Pčelica osnovano je 2017. godine u Živinicama Gornjim. „Udruženje“ broji 140 aktivnih članova, dok ih je više od stotine u statusu pomažućeg člana. Udruženje „PČELICA“ organizuje aktivnosti u oblasti ekologije i poljoprivrede, gdje bi se zajednica organizovala i kao takva max. koristila potencijale koji se nude u mjestu ali i šire. Posebna snaga „Udruženje“ su: sekcije Žene pčelarke i Mladi pčelari. Provode akcije zaštite životne sredine i ekološke zaštite staništa biljnog i životinjskog porijekla. Generalni cilj projekta je zaštita pčelarstva i pčelarske proizvodnje i ekologije, u skladu sa materijalnim i prirodnim resursima i međunarodnim standardima, te provjerenim okolišnim praksama. Projektom planirana aktivnost, između ostalih, je i organizacija besplatne „Edukacije pčelara, ekologa i aktivista na zaštitu životne sredine“ i radionica na polivalentnu temu iz oblasti zaštite životne sredine i očuvanja okoliša. „Edukacije pčelara, ekologa i aktivista na zaštitu životne sredine“ će početi 15.11.2023. godine i odvijati će se do 15.03.2024. godine, a sastoje se od teoretske i praktične nastave, odnosno šest (6) sesija iz sljedećih oblasti: 1. Održivi razvoj i ekologija; 2. Razvoj ruralnih/urbanih područja; 3. Dobre pčelarske prakse. Projektom žele riješiti problem adekvatnog prostora koji bi bio dostupan različitim ciljnim grupama (ekolozi, planinari, biciklisti, pčelari) radi dostizanja zajedničkih ciljeva. Zelena učionica bi bila prostorno i tehničko rješenje za područje Živinica što bi im omogućilo bolje uslove za rad i boravak, razvoj udruženja u pogledu članstva, čime bi se osigurala osnova za rješavanje problema u standardizaciji ekoloških narativa. Prvi korak na normiranju i standardizaciji djelovanja članova Udruženja je edukacija, odnosno primjena kurikuluma za oblast pčelarstva i zaštite životne sredine. Partneri projekta su: PD Nektar, Tuzla; Ekološka sekcija "Ekovozija"; JU Gimnazija, Živinice; Ekološki savez "Eko-zeleni" TK; up "Api Roj" Živinice.

Aplikant: BZK "Preporod" Kladanj

Naziv projekta: Ni jedna više

Odobreno sredstava: 7.545,00 KM

„Preporod“ u Kladnju intenzivno je prisutan u kulturnom i društvenom životu. Posebno je okrenut „živoj kulturi“, tj. svakodnevnim kulturnim događajima kakvi su: tribine, javna predavanja, književni susreti, promocije, koncerti, izložbe, ali i organizator je i nosilac razvoja drugih kulturnih aktivnosti, različitih sekcija, uključujući adekvatnu prezentaciju narodne kulture i folklor. U okviru društva djeluje i muzička sekcija koja njeguje isključivo sevdalinku. Društvo učestvuje u svim kulturnim manifestacijama koje organizuje Općina Kladanj i u obilježavanju značajnih datuma događaja i ličnosti. Kontinuirano i uspješno društvo realizuje projekte koji imaju svoj dugogodišnji kontinuitet iz oblasti kulture, prosvjećivanja i edukacije mladih te



očuvanja i oživljavanja tradicionalnih vrijednosti. Cilj projekta je podizanje svijesti o femicidu i sve učestalijem rodno zasnovanom nasilju. Projektom „Ni jedna više“ žele povećati svoju ulogu u zajednici i kroz razne kulturne sadržaje podići svijest o zabrinjavajućoj situaciji i bitnosti hitne reakcije nadležnih institucija u vezi sa femicidom i rodno zasnovanim nasiljem. Žele aktuelizirati prevenciju svih oblika nasilja nad ženama. Projekat podrazumijeva gostovanje predstave "Žene u crvenom", tematske radionice uz učešće predstavnika Centra za socijalni rad, Doma zdravlja, Policijske Uprave, Crvenog križa, Udruženja „Žena ženi“, IKC – Radio Kladanj, profesora, nastavnika i osoblja Osnovnih i srednjih škola, Dječijeg obdaništa Edina Čamdžić, i Općine Kladanj...(Partneri u projektu). Cilj je aktuelizirati prevenciju svih oblika nasilja nad ženama, djevojčicama i u porodici, te spriječiti buduće slučajeve femicida. Za implementaciju projekta, narednih aktivnosti koje predstoje, te bolju kvalitetu u svakodnevnom radu i jačanju kapaciteta, neophodna je tehnička oprema kojom trenutno društvo ne raspolaže.

Aplikant: UG oštećenog vida Tuzla

Naziv projekta: Razvoj članstva kao jedna od pretpostavki za pružanje kvalitetnije podrške slijepim osobama u Tuzli i TK

Odobreno sredstava: 7.750,00 KM

UG oštećenog vida osnovano je 1999. godine. Broji oko 300 članova, slijepih i slabovidih osoba različite dobi i nivoa obrazovanja iz Tuzle, Kalesije, Srebrenika, Gradačca, Sapne, Teočaka i Čelića. Radi na zagovaranju za prava slijepih osoba; neformalnoj edukaciji (opismenjavanje na brajevom pismu, obuka za korištenje kompjutera, za kretanje uz pomoć bijeloga štapa, strani jezici, itd.); osnaživanje žena i mladih (zdravstveno prosvjeđivanje, organizacija omladinskih kampova); pruža savjetodavne usluge članovima i njihovim porodicama u prostorijama ili direktno u porodicama; radi na razvijanju svakodnevnih vještina (pripremanje hrane, peglanje, šivenje, prepoznavanje novca, itd.); provodi aktivnosti iz oblasti sporta i rekreacije. Cilj projekta: je doprinijeti stvaranju pretpostavki za poboljšanje kvaliteta pružanja usluga članstvu i njegovom omasovoljenju. Projekat „Razvoj članstva kao jedna od pretpostavki za pružanje kvalitetnije podrške slijepim osobama u Tuzli i Tuzlanskom kantonu“ omogućit će standardizirano prikupljanje i ažuriranje podataka o članstvu, prikupljanje nedostajućih podataka i osnaživanje članova upravljačkih struktura, poticanje slijepih osoba da se učlane u Udruženje i drugih zainteresiranih aktivista kroz psihološke radionice. Projektom planiraju razviti aplikaciju za prikupljanje podataka, odnosno kreirati bazu. Putem direktnih kontakata i medija potaknut će članove na odgovorniji pristup njima samima. Razvijena aplikacija za prikupljanje podataka koristit će se i nakon završetka projekta. U okviru projekta provest će se slijedeće aktivnosti: 1. Kreirat će se jedinstvena aplikaciju za unos i ažuriranje podataka o članstvu. 2. Unijet će u bazu raspoložive podatke za svakog člana i prikupiti nedostajuće podatke. 3. Upriličit će najmanje pet gostovanja aktivista Udruženja na lokalnim radio stanicama radi informisanja potencijalnih novih članova i njihovih porodica o prednostima učlanjenja u Udruženje. 4. Održat će četiri jednodnevne psihološke radionice za osnaživanje članova upravljačkih struktura i drugih zainteresiranih aktivista. Korisnici projekta bit će slijepe i visoko slabovide osobe iz Tuzle, Srebrenika, Gradačca, Kalesije, Sapne, Teočaka i Čelića.

Aplikant: RK Vidara Gradačac

Naziv projekta: Mladi ronionci - spasioci

Odobreno sredstava: 6.000,00 KM



Svi smo svjedoci da omladina odlazi van granica BiH, tako organizacije koje se bave usko profilisanim i jako rijetkim sportom kao što je ronjenje i spašavanje na vodi, dolaze u deficit sa članovima, a broj članova i ljudstvo jeste najveće bogastvo njihovog kluba. Svjedoci smo da su poplave sve češći problem i u narednim godinama možemo očekivati sve više intervencija spašavanja ljudi i materijalnih dobara u akcijama spašavanja iz poplava, tako da RK Vidara treba još aktivnih mladih ronilaca – spasilaca koji bi pomogli u akcijama spašavanja na cijelom Tuzlanskom kantonu. Klub je ujedno i oficijelna Služba za spašavanje na vodi i pod vodom pri Kantonalnoj Upravi Civilne zaštite TK, što znači da su prvi odgovor pri pojavi poplava i svih elementarnih nepogoda. Do sada su mogli odgovoriti na sve intervencije koje su se ticale Tuzlanskog kantona pa i šire, i svaku intervenciju su uspješno završili, ali klubu je neophodno pojačanje ljudskih resursa sa mladim muškim i ženskim osobama koje su spremne biti dio tima. Cilj projekta je jačanje ljudskih kapaciteta RK Vidara (povećanje broja članova), mogućnost teorijske obuke novih članova, te bolja spremnost ekipa za spašavanje od poplava u TK. Žele povećati članstvo adekvatnom promocijom svoga rada, za što do sada nisu imali priliku. Zbog nedostatka sredstava nikada nisu uspjeli nabaviti računar - tablet u klubu, napraviti oficijelnu web stranicu, ulagati u promovisanje facebook stranice, instagram stranice i slično. Tako bi kroz video klipove, slike i prikaz aktivnosti koje su zabilježene kroz 40 godina rada privukli nove članove i pojačali interne kapacitete. Projektom također žele organizovali obuku i radionicu za mlade članove, predstaviti im tom prilikom teorijski dio obuke. Nakon toga bi uslijedila praktična obuka, a kruna projekta bi bila „Eko akcija“ sa novim članovima kluba na jezeru „Vidara“. Partneri projekta su: Grad Gradačac, Eko Zeleni, Gradačac.

Aplikant: Omladinski pokret Revolt Tuzla

Naziv projekta: Unaprjeđenje organizacijskih kapaciteta i osnaživanje omladinskih aktivista/ica

Odobreno sredstava: 8.000,00 KM

OP "Revolt" je organizacija koja okuplja mlade u borbi protiv nepravde, siromaštva, nasilja, korupcije, diskriminacije, neodgovornih politika... Osnovni programski ciljevi Omladinskog pokreta „Revolt“ su: podsticanje, ohrabivanje i motivisanje mladih ljudi za učešće u javnom životu BiH; zalaganje za građansku i demokratsku Bosnu i Hercegovinu, a protiv nacionalnih, vjerskih, rasnih i drugih netrepeljivosti; promovisanje ideja socijalne pravde i sigurnosti u cilju smanjenja socijalno-ekonomskih razlika; borba za besplatno i jednako dostupno osnovno, srednje i visoko obrazovanje; borba za besplatne i jednako dostupne zdravstvene usluge; promocija opštih ljudskih prava i sloboda, itd. Generalni cilj projekta je: ojačati interne organizacijske kapacitete i osnažiti društveno koristan rad. U sklopu projekta "Unaprjeđenje organizacijskih kapaciteta i osnaživanje omladinskih aktivista/ica", Omladinski pokret "Revolt" će sve aktivnosti usmjeriti na unaprjeđenje programa i usluga koje organizacija provodi prema članovima/icama, ali i korisnicima/ama. Prije svega, nastojat' će se unaprijediti postojeće, te razviti nove usluge/aktivnosti za članstvo. Tu spadaju aktivnosti promocije ljudskih prava kroz online kampanje, radionice i treninge iz oblasti djelovanja organizacije. Četiri glavne projektne aktivnosti će biti: 1. evaluacija dosadašnjeg rada, 2. strateško planiranje; 3. trening jačanja kapaciteta o vođenju medijske kampanje; 4. kreiranje videozapisa.

Aplikant: Udruženje "RE-SET" Tuzla

Naziv projekta: Stvarajmo zajedno mogućnost za uspjeh mladih osoba sa invaliditetom



Odobreno sredstava: 7.000,00 KM

Udruženje za edukaciju, profesionalno osposobljavanje i socijalno osnaživanje osoba sa invaliditetom TK "RE-SET" registrovano je u augustu mjesecu 2020. godine, a aktivno djeluje od juna 2021. godine. Udruženje „RE-SET“ osnovano je sa ciljem pružanja podrške osobama sa invaliditetom i radu na stvaranju društva u kojem će svi imati jednake šanse i prilike. Misija "RE-SET" udruženja jeste stvaranje mogućnosti i uslova za edukaciju, profesionalno osposobljavanje i socijalno osnaživanje, ravnopravno učešće i sveukupnu afirmaciju mladih osoba sa invaliditetom u društvenoj zajednici. Generalni cilj projekta je: stvaranje efikasnije mogućnosti za mlade osobe sa invaliditetom kako bi bile motivisane i uključene u proces aktivnog i ravnopravnog uključivanja u društvenu zajednicu. Projektni ciljevi/svrha: unaprjeđenje socijalnih kompetencija osoba sa invaliditetom, aktivnije uključivanje društvene zajednice u proces rješavanja problematike nezaposlenosti mladih osoba sa invaliditetom, njihova smanjena nezaposlenost, djelovanje prema vlastima na opštinskom i kantonalnom nivou. S obzirom da osobe sa invaliditetom teško iskazuju svoje ambicije, da su često diskriminirane i ne mogu na adekvatan način da pokažu svoje kompetencije, stvorila se potreba za drugačijim pristupom prema osobama sa invaliditetom kako bi se na jedan drugačiji i inovativni način motivisale i pokazale društvenoj zajednici da itekako mogu biti korisne bez obzira na svoj invaliditet. Drugačijim pristupom i metodom stvorio bi se preduslov da i druge osobe sa invaliditetom budu više motivisane tako što budu slijedile primjer učesnika projekta. Kompletnoj društvenoj zajednici je od velike važnosti inkluzija osoba sa invaliditetom u svim društvenim tokovima, te veći stepen obrazovanja i zapošljavanja osoba sa invaliditetom kako u budućnosti ne bi bili u stanju socijalne potrebe. Tokom trajanja projekta i po samoj implementaciji stvorio bi se preduslov da društvena zajednica ima generalno drugačiju percepciju i veći stepen svijesti prema osobama sa invaliditetom. Planiraju kroz projekat promovisati i organizaciju koja se bavi edukacijom, profesionalnim osposobljavanjem i socijalnim osnaživanjem osoba sa invaliditetom, te da su u periodu od 2 godine aktivnog djelovanja postigli izuzetne rezultate. Partneri u projektu: Edukacijsko-rehabilitacijski fakultet Univerziteta u Tuzli.